

Tii! Demokraatit siulittaasuannut akissutissara tassa ... tii!

(Naaggalu: Inatsisartut Siulittaasoqarfiat killilersuillunilu mattussuinngilaq!)

Allattoq Hans Enoksen, Inatsisartut Siulittaasuut

Misigisamut aalaterneqataasumut suugaluartumulluunniit uunnaavimmik ikkusseriarluni qalakkaangat tiiliortarneq tuluit ileqqorisaraat oqartoqartarpoq.

Nammineq aamma tiitorusuummeraluarpunga sapaatip akunnerata siuliani allaaserisami Demokraatit siulittaasuannit Jens-Frederik Nielsenimit allanneqarsimasumi atuarakku Inatsisartut Siulittaasoqarfiat inatsimmik tunngaviusumik unioqqutitsisimasoq, ilaasortanik killilersuisimasoq, mattussuisimasoq il.il.

Immaqa aamma Jens-Frederik Nielsen qarasaasiami saavanut allaaserisaq allanniarlugu inginnginnermini tiitoqqaarsimasuuguni pitsaanagerusimassagaluarpoq. Tii ilisimaneqartutut eqqissiallannartumik sunniteqartarpoq, eqqissimanagerlu isumatusaarnermik malitseqartarluni ... Tiitorluniliuna aamma pitsaasumik oqaloqatigiittoqarsinnaasartaq. Aammami Jens-Frederik Nielsen kiinarsillugu akissuteqarfigerusussimagaluarpara. Soormi tusagassiorfitsigut attaveqatigiittassaagut ullut tamaasa Inatsisartuni naapittarluta? Siulittaasoqarfilli kikkut tamarmik atuarsinnaasaannik inatsimmik tunngaviusumik unioqqutitsisutut ilaasortanillu killilersuisutut mattussisutullu pisuutinneqartillugu innuttaasut aamma nassuiaateqarfigineqarnissaat pissusissamisoorsorinarpoq. Maannalu tassa tullinnguuppunga qarasaasiamma saavanut ingeriarlunga allannissannut.

Jens-Frederik Nielsenip allaaserisamini unnerluussissutai tunngavilersuutaalu ataasiakkaat ataasiakkaarlugit misissuataarlugit illuatungilersorlugillu atuartussat piffissaannik tigusiannngilanga. Naatsunik oqaatigalugu suliaq pineqartoq tassaavoq Inatsisartut 2019-imi aalajangiiffigisassatut siunnersuummik akuersissuteqarmata, tassuuna Siulittaasoqarfik qinnuigineqarluni malittarisassioqqullugu Inatsisartut aningaasartuutaannik kikkulluunniit paasitinneqarsinnaatitaalernissaanik ammaassisunik.

Ataatsimiinneq ingerlasoq sioqqullugu aalajangiiffigisassatut siunnersuutip taassumarpiap nutaamik saqqummiuteqqinneqarnissaa Demokraatit kissaatigaat. Siulittaasoqarfiup aalajangiiffigisassatut siunnersuutip oqaluuserisassanut ilanngunneqarnissaa itigartippaa, siunnersuutip akuersissutigineqareersimanera malittarisassanullu missingiutip suliarineqalereersimanera innersuussutigalugit. Malittarisassat Demokraatit eqqunneqartussatut kissaatigisaat allatut oqaatigalugu piviusunngulerput, tamatuminnga Demokraatit siunnersuuteqartariaqaratilluunniit. Taava isumaqartoqassagaluarpoq tamanna Demokraatit siulittaasuata nuannaarutigissagaa. Naamiluunniit!

Jens-Frederik Nielsen isumaqarpoq tamatumani pineqartoq utoqqatsissut, tassunga tulluussagaq, siunnersut siulittaasoqarfimmit nuannarineqanngitsoq itigartiinniaannarlugu. Demokraatimmi "ilisimallunnarpaat" Siulittaasoqarfiup qaqugukkulluunniit Demokraatinut, Inatsisartunut innuttaasunulluunniit nalunaaruteqarsimanngitsoq malittarisassat taamaattut suliarineqarnerinik. Inerniliunneqartorlu – Jens-Frederik Nielsenip inerniliinera – taamaalillunilu tassaalerpoq, siulittaasoqarfik "puussimasoq, misissorneqarnissartik puussutigalugu", tamannalu pissutigalugu killilersuillutillu mattussuisimallutik.

Aap. Aallaqqaasiutigalugu naqissuserlara malittarisassat kissaatigineqartut SULIARINEQARMATA, siulittaasoqarfiullu kingullermik tamanna paasisutissiissutigimmagu inatsisissatut siunnersuummut 2020-mi upernaakkut ataatsimiinnermi siulittaasoqarfimmit saqqummiunneqartumut (UPA2020/168) nassuiaatini.

Jens-Frederik Nielsen assuariniangilara tamanna malugiitsorsimassagaluarpagu. Ataatsimiinnerup nalaani paasisutissat Inatsisartunut ilaasortanut tunniussuunneqartartut annertusinnaasarput tamattalu arajutsisaqarsinnaasarluta. Apeqquteqarusussimanissaali kissaatigisinnaasimagassagaluarpara.

Aamma Siulittaasoqarfik killilersuinerarlugu mattussuinerarluguluunniit pasillisiimanginnissaa kissaatigisimassagaluarpara.

Siulittaasoqarfimmut ilaasortat taama ilungersunartigisumik unnerluutigineqarnermut pisuussuteqanngilluinnartut kisiisa eqqarsaatiginagit, kisiannili aamma qinikkat aqputigalugit innuttaasut oqartussaaqataanerannik innuttaasut ataqqinninnerannik tamanna innarliisinnaammat: Innuttaasummi isumaqalersinneqarsinnaapput inatsisaatsuuneq nunatta inatsisartuini nalinginnaalersimasoq, immaqaluunniit isumaqalersinneqarsinnaallutik nunatsinni qinikkat imminnut oqaloqatigiissinnaajunnaavissimasut.

Siulleq qujanartumik itigartissinnaavara – aammaluni immaqa aappaa, nangaanerulaartumilli. Kisianni tamanna uterfigilaarallarlara. Siullermik Jens-Frederik Nielsenimut oqaatigisariaqarpara aappaatigut paasillaarsinnaagakku isumaqarpat Inatsisartut aningaasaqartuutaannik paasitinneqarsinnaatitaaneq pillugu inatsisissatut siunnersuummik suliaqarneq sukkaappallaartumik ingerlasimasoq.

Jens-Frederik Nielsenip nammineq oqaatigaa piffissami qaangiuttumi siunnersuutinik allanik saqqummiussinissaminnut Siulittaasoqarfik piffissaqarluarsimagaluartoq. Tamanna ilumoorpoq! Siulittaasoqarfik inatsisissatut siunnersuumik naalakkersuisunut § 37 malillugu apeqqutinik taaneqartartut aqputigalugit Inatsisartunut ilaasortat paasisutissanik pissarsiniarsinnaatitaanerannik erseqqissaasumik saqqummiussaqaarsimapput, taamatullu aanna Kukkuersiuihermut Ataatsimiititaliap Naalakkersuisunit paasisutissanik pissarsiniarsinnaatitaanerannik erseqqissaasumik inatsisissatut siunnersuuteqarsimalluni. Siunnersuutinut taakkununga marlunnut tamanut tunngaviuvoq Naalakkersuisut pisuni aalajangersimasuni paasisutissanik Inatsisartunut tunniussaqaarnissartik itigartittarsimammassuk malittarisassanik Naalakkersuisut paasinninnerat innersuussutigisarlugu.

Pingaartumik Kukkuersiuihermut Ataatsimiititaliap, kisiannili aamma Inatsisartunut ilaasortat, paasisutissanik Naalakkersuisunit pissarsisinnaatitaanerannik Inatsisartut Naalakkersuisunik nakkutilliinerannut tunngavissaavoq pingaarutilik, pissusissamisuunngilluinnarlunilu taamatut pissarsisinnaatitaanerannik killillissarititit pillugit nalorngissuteqartoqalerpat isumaqatigiinngissuteqartoqalerpalluunniit. Taamaattumik siulittaasoqarfiup tamanna pillugu inatsisiliornertigut killissarititit sapinngisamik piaarnerpaamik erseqqissarniarneqarnissaat pisariaqartutut isigisimavaa.

Tassanngaanniit apeqqutigineqarsinnaavoq suliniutit taakku ilumut Inatsisartut aningaasartuutaat pillugit paasitinneqarsinnaatitaanerannik malittarisassanik aamma pingaaruteqarnerusimanersut. Aap, uanga taamatut isumaqarpunga – ukiorpassuarnimi siulittaasoqarfiup aalajangersimasumik

suleriaaserisimammagu taamatut Inatsisartut aningaasartuutaanik paasitinneqarnissamik qinnuteqaatit suugaluartulluunniit akuersissutigisarlugit.

Tamatumunnga atatillugu aamma oqaatigilara Inatsisartut MALITTARISASSAQAREERMATA Inatsisartut Siulittaasuata ilassinninnernut aningaasartuutigisartagai akeqanngitsumillu ajunngitsorsiai pillugit kikkut tamarmik paasitinneqarsinnaanissaannik qularnaarinnittunik, soorlu aamma Inatsisartut ukiumoortumik nalunaarutigisartagaat kikkunnut tamanut sukumiisorujussuarmik paasissutissiisartut ukiumi pineqartumi Inatsisartunut aningaasaliissutigineqartunik Inatsisartut qanoq atuisimanersut.

Tamanna tunngavigalugu Inatsisartut aningaasartuutaanik paasitinneqarsinnaatitaaneq pillugit inatsisissatut siunnersuusionerq suliassanit pisariaqarnerusunit tunulliunneqartariaqarsimavoq, immaqalu immaqa kissaatiginartumit sivilunerusumik utaqqineqartariaqarsimalluni. Pissutsimmi imaapput uagut qinikkatut sulinitsinni soorunami pissusissamisoorumik kissaatigisaratsigu isummatta ingerlaannaq, imaluunniit pinngitsoornani tuavionerpaamik, piviusunngortinneqarnissaat. Ilaannikkut puigortuunnartarparput isummap isummassarsiarineraniit isummap piviusunngortinniarneqarneranut piffissaq sivilunerusujussuaq pisariaqartinneqarsinnaasarmat.

Isumassaaleqinngilagullumi: Naatsorsuinerup takutippaa Inatsisartunut ilaasortat 2016-imi 111-nit ikinnerunngitsunik aalajangiiffigisassatut siunnersuutitik saqqummiussaqaarsimasut. Taakku – ilaasortanut ataatsimut naatsorsorlugit – Folketingimut sanilliullugit pingasoriaataat affarlu tikillugit amerlanerupput. Tamanna tunniusimanermik ersersitsivoq uanga Inatsisartut Siulittaasuattut nuannaarutigiinnarsinnaasannik, kisiannili aamma peqatigisaanik ernumalissutigisinnaasannik. Tassami aalajangiinerpassuit iliuseqarnermik malitseqartinneqartartussaapput, allaffissornikkullu nukissat killeqanngitsuunatik.

Taavami allaffissornerq annertusineqaannarsinnaagaluartoq tamatumani oqartoqaannarsinnaagaluarpoq. Kisiannili aamma allaffissornerup qanoq annertutigilersinnaaneranut killissaqarpoq. Eqqaamanerlunggikkukku allaffissornerq annertuallaalersimanerarlugu Demokraatit siusinnerusukkut oqaaseqarnikuugaluarput?

Matumani unammillerniagassaq taamaalilluni tassaavoq piffissatta nukissattalu suliassanut sunut atornerqarnissaannik pingaarnersiuinissarput. Assersuutigalugu isumaqarpa malittarisassanik SULIARINEQALEREERSUNIK suliaqarnissaamik siunnersuutip suliarineqarnissaanut piffissamik nukissanillu atuissagutta?

Taamaalilluta oqaloqateqarsinnaanermik piginnaaneqarneq uterfigeqqipparput. Tassami Jens-Frederik Nielsen inatsisissatut siunnersuutip neriorsuutigineqarsimasup suliarineqarnerata killiffia paaserusussimasuuguniuk aperiinnarsinnaasimagaluarpat. Siulittaasup matua Inatsisartunut ammajuarpoq, nillujuitsullu imaqartuaannarlutik, aamma tiimik ...

Soorlu aamma matut ammareersut isimmillugit ammarniarsarinerinut uagut nammineq allallu nukii atortariaqangikkivut, immaqa aamma qussalaatsunik tunngavissaqanngitsunillu pasilliinerit sipaarsinnaagaluarpagut oqaloqatigiinnissamat immitsinnut piffissaqartittartuugutta. Akissutissarserusukkutta imminut nilliaffigisariaqanngilagut.